



Uunga siunnersuut: Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat nr. xx, xx. xxx 2019-imeersoq

(Ineqarnermut Attaveqaqatigiinnermullu Naalakkersuisoq)

Qanimut oqartussaaqataanerup sukut tamatigut nukittorsartuarneqarnissaa Inuit Ataqatigiinniit pingaartilluinnakkatta ilagilluinnarpaat. Taamaattumik tamanna pillugu, ukiuni kingullerni kommunit nammineernerulernissaannik, oqartussaanerulernissaannik, akisussaaffinnillu kivitseqataanerulernissaannik suliniutaasimasut sulluunniit tamaasa peqataaffigalutigillu tapersersortuarsimavagut.

Una suliniut Naalakkersuisut tungaanniit saqqummiunneqartoq taamatut aamma nalilersorparput.

Inissialiortititsisarnermut tunngatillugu, soorlu piginneqatigiilluni illulianut, nammineq illuutitut, sanaqatigiillunilu illulianut, aningaasalersuisarnermullu tunngasut tamassa ilanngullugit, kommunit attartortitsisarnermut tapiisuteqartarnermullu akissussaaffik tamanna tigoreersimalerpaat.

Uuma inatsisissap suliarineqaratigut akuerineqartigullu, inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersumi kapitali 2-mi aamma kapitali 3-mi kommunit inissiaataannut attartortittakkanut illunullu ataatsimoorussanut tapersiissuteqartarnermut aalajangersakkat atorunnaassapput ingerlateqqinneqassanatillu.

Inatsisissap uuma akuerineratigut kingunissaasa ilagilissavaat boligstøtte aqutigalugu illuliassanut kommunit tapiisssuteqartalernissaat.

Takisuuliutiginagu naatsumik oqaatigalugu siunertaq anguniagarlu iluatinnartoq pingaaruteqartorlu tamaattumillu tapersersornartoq.

Taamaattoq Inuit Ataqatigiinniit qulakkeerluarusupparput ilumut uuma inatsisissap pilersinneqarneratigut kommuninut aningaasat tungaatigut nammakkerneqannginnissaat.

Taamaattumik tamanna pillugu, kommuninut aningaasatigut qanoq kingunerisinnaasaasa pillugit eqqortumik nassuiaasoqarsinnaaqullugu, apeqqutillu aningaasanut tunngassuteqartup qulaajarneqarsinnaanissaa siunertaralutigu, matumuuna Inuit Ataqatigiinniit ataatsimiititaliamut susassaqartumut aappassaaniinginnerani suliareqqitassanngorlugu ingerlateqqipparput.

Qujanaq

In.in.

Peter Olsen